

Na osnovu člana 21. stav 3. Zakona o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine ("Službene novine Federacije Bosne i Hercegovine", broj: 15/05) i Plana povratka, obnove, gradnje i razvoja održivosti povratka za 2024. godine, usvojen Zaključkom Vlade Federacije BiH, V. broj: 510/2024 od 08.04.2024. godine, federalni ministar raseljenih osoba i izbjeglica, **raspisuje**

Javni poziv za podršku očuvanju radnih mjesta i unapređenju uslova rada povratnika u 2024. godini

I - PREDMET JAVNOG POZIVA

Predmet javnog poziva je podrška očuvanju radnih mjesta i unapređenje uslova rada povratnika u poslovnim subjektima u privatnom vlasništvu, i to: mikro, malim i srednjim preduzećima, obrtima, komercijalnim poljoprivrednim gazdinstvima, zadrugama i zadružnim savezima, koji djeluju na području entiteta Republika Srpska, Brčko Distrikta Bosne i Hercegovine i entiteta Federacija Bosne i Hercegovine za područja srednje razvijenih, nerazvijenih i izrazito nerazvijenih općina i gradova (u skladu sa indeksom razvijenosti Federalnog zavoda za programiranje razvoja).

II – CILJ JAVNOG POZIVA

Cilj javnog poziva je pružanje podrške očuvanju postojećih radnih mjesta za uposlene iz kategorije povratnika koji spadaju u manjinski zastupljene populacije, u skladu sa Aneksom VII, član 1. tačka 3. stav d) Općeg okvirnog sporazuma za mir u Bosni i Hercegovini, a prema posljednjem popisu stanovništva u Bosni i Hercegovini, radi podrške održivom povratku.

III – PRAVO UČEŠĆA

Pravo apliciranja na javni poziv imaju poslovni subjekti u privatnom vlasništvu:

- a) koji su danom apliciranja registrovani po važećim zakonskim propisima, a kvalifikuju se kao mikro, mala, srednja preduzeća ili samostalni preduzetnici, obrti, trgovačke radnje, komercijalna poljoprivredna gazdinstva, te zadruge i zadružni savezi;
- b) koji danom objave javnog poziva imaju najmanje 1 (jednog) a najviše 249 prijavljenih uposlenika (klasifikacija u skladu sa Zakonom o računovodstvu i reviziji u Federaciji Bosne i Hercegovine), gdje se broj uposlenika odnosi na ukupan broj uposlenih radnika na nivou cijelog poslovnog subjekta, uključujući sve registrovane poslovne jedinice i/ili podružnice, od čega minimalno jednog uposlenika iz kategorije manjinskih povratnika;
- c) koji obavljaju poslovnu djelatnost najmanje 3 godine prije dana objavljivanja ovog javnog poziva;
- d) koji imaju sjedište ili registrovanu poslovnu jedinicu na području entiteta Republika Srpska, Brčko Distrikta Bosne i Hercegovine ili na području srednje razvijenih, nerazvijenih i izrazito nerazvijenih općina i gradova u Federaciji Bosne i Hercegovine prema indeksu razvijenosti jedinica lokalne samouprave Federalnog zavoda za statistiku, i to: Ravno, Vareš, Domaljevac-Šamac, Ključ, Bužim, Drvar, Glamoč, Čelić, Teočak, Pale-Prača, Sapna, Bosansko Grahovo, Dobretići, Grad Livno, Fojnica, Olovo, Grad Zavidovići, Foča-Ustikolina, Kalesija, Grad Stolac, Grad Bosanska Krupa, Grad Cazin, Tomislavgrad, Gornji Vakuf-Uskoplje, Velika Kladuša, Prozor - Rama, Odžak, Sanski Most, Kladanj, Bosanski Petrovac, Vitez, Grude, Grad Visoko, Kreševo, Banovići, Grad Gračanica, Neum, Posušje, Usora, Grad Živinice, Kiseljak, Grad

Lukavac, Kakanj, Jablanica, Travnik, Grad Gradačac, Grad Ljubuški, Novi Travnik, Grad Konjic, Bugojno, Kupres, Doboj-Istok, Grad Čapljina, Grad Srebrenik, Maglaj, Žepče, Breza, Busovača i Grad Orašje.

IV – OGRANIČENJE UČEŠĆA

U ovom javnom pozivu ne mogu učestvovati: nevladine organizacije/udruženja građana, organi uprave, javne institucije, ustanove i javna preduzeća, vjerske zajednice, kao i poslovni subjekti koji nisu ispunili ugovorene obaveze prema Federalnom ministarstvu raseljenih osoba i izbjeglica u ranijem periodu po ranijim javnim pozivima i programima.

V – OPĆI KRITERIJI I POTREBNA DOKUMENTACIJA

Aplikanti su obavezni prilikom prijave na Javni poziv dostaviti:

1. Čitko popunjen, potpisan i ovjeren pečatom aplikanta prijavni obrazac, koji je dostupan na internet stranici Ministarstva <https://fmroi.gov.ba/> ili se može preuzeti lično u Ministarstvu, na adresi Hamdije Čemerlića br. 2., Sarajevo;
2. Rješenje o registraciji aplikanta (original ili ovjerena kopija od strane nadležnog organa ne starija od 30 dana);
3. Uvjerenje o poreskoj registraciji (ID/JIB broj) aplikanta (original ili ovjerena kopija od strane nadležnog organa ne starija od 30 dana);
4. Potvrda banke da aplikant ima aktivan transakcijski račun (original ili ovjerena kopija od strane nadležnog organa ne starija od 30 dana);
5. Uvjerenje o izmirenim porezima i doprinosima kao dokaz da aplikant nema dugovanja za obaveze po osnovu direktnih poreza i doprinosa izdato od nadležne Poreske uprave (original ili ovjerena kopija od strane nadležnog organa ne starija od 30 dana);
6. Uvjerenje da aplikant nema dugovanja po osnovu indirektnih poreza ukoliko je PDV obveznik (original ili ovjerena kopija od strane nadležnog organa ne starija od 30 dana), a ukoliko nije PDV obveznik aplikant dostavlja izjavu da nije u sistemu indirektnog oporezivanja (potpisana i ovjerena od strane aplikanta);
7. Lista osiguranih uposlenika kod aplikanta na dan objave javnog poziva izdata od nadležne Poreske uprave (original ili ovjerena kopija od strane nadležnog organa ne starija od 30 dana);
8. Uvjerenja o povratku za uposlene povratnike za čiju podršku u očuvanju radnih mjesta i unapređenju uslova rada se aplicira (original ili ovjerena kopija od strane nadležnog organa ne starija od 30 dana);
9. Izvod iz matične knjige rođenih za uposlene povratnike (original ili ovjerena kopija od strane nadležnog organa ne starija od 30 dana), a ukoliko u izvodu nije naznačena nacionalnost, uz izvod iz matične knjige rođenih se obavezno dostavlja svojeručno potpisana izjava uposlenog povratnika o nacionalnosti (primjer izjave dostupan na internet stranici Ministarstva).

VI – FINANSIJSKA SREDSTVA

Odobrena sredstva po jednom uposlenom povratniku iz kategorije povratnika koji spadaju u manjinski zastupljene populacije, u skladu sa Aneksom VII, član 1. tačka 3. stav d) Općeg okvirnog sporazuma za mir u Bosni i Hercegovini, a prema posljednjem popisu stanovništva u Bosni i Hercegovini, može iznositi maksimalno do 4.000,00 KM.

Tačan iznos sredstava po jednom uposlenom povratniku, uključujući i vlasnike obrta ili komercijalnog poljoprivrednog gazdinstva, ukoliko su prijavljeni kao osigurana lica poslovnog subjekta, će biti određen na osnovu ukupnog broja potencijalnih korisnika i budžetskih sredstava izdvojenih za ove namjene, a u skladu sa posebnim procedurama za izbor korisnika.

Maksimalan iznos koji se može odobriti jednom poslovnom subjektu je do 150.000,00 KM.

Ukupan iznos planiranih sredstava za realizaciju ovog javnog poziva je do 4.000.000,00 KM.

Sredstva po ovom javnom pozivu će se doznačiti jednokratno nakon potpisivanja ugovora o namjenskom korištenju sredstava, na transakcijski račun korisnika.

VII – OBAVEZE KORISNIKA

Korisnici sredstava po ovom javnom pozivu, sa kojima bude zaključen ugovor o namjenskom korištenju budžetskih sredstava, se obavezuju:

- Da uposlenim povratnicima za koje dobiju sredstva, isplate najmanje 10% od doznačenih sredstava po uposleniku (neto iznos) kao dodatni prihod, pored plate i naknada po osnovu rada;
- Da sredstva utroše namjenski u razvoj poslovanja, i to za nabavku stalnih sredstava te proširenje i/ili adaptaciju poslovnih prostorija.

Korisnik može do 5% od ukupnog iznosa pravdati kao troškove redovnog poslovanja (komunalni troškovi i/ili troškovi zakupa poslovnih prostorija).

VIII - NAČIN IZBORA KORISNIKA I POSEBNI KRITERIJI

Izbor korisnika po osnovu ovog javnog poziva vršit će posebna komisija koju imenuje federalni ministar raseljenih osoba i izbjeglica. Komisija će razmatrati prijave u skladu sa odredbama ovog javnog poziva i procedurama za izbor korisnika.

U slučaju većeg broja aplikacija, koje zbirno prelaze iznos planiranih budžetskih sredstva za realizaciju ovog javnog poziva, prioritetni kriteriji pri odabiru korisnika za područje Federacije Bosne i Hercegovine su:

- Stepenn razvijenosti općine/grada na području na kojem su uposleni povratnici počev od izrazito nerazvijenih općina/gradova, i
- Period poslovanja poslovnog subjekta.

Poslovni subjekti koji zapošljavaju povratnike na području entiteta Republika Srpska imaju isti prioritet kao i poslovni subjekti iz izrazito nerazvijenih općina/gradova u Federaciji Bosne i Hercegovine.

IX – ROK ZA PRIJAVE I NAČIN PODNOŠENJA PRIJAVA

Prijavni obrazac sa traženom dokumentacijom dostaviti lično ili poštom preporučeno, na adresu:

Federalno ministarstvo raseljenih osoba i izbjeglica
Hamdije Čemerlića 2
71000 Sarajevo
sa naznakom

“Prijava na Javni poziv za podršku očuvanju radnih mjesta povratnika u 2024. godini”

(Na poleđini koverta navesti naziv podnosioca, adresu i kontakt telefon)

Rok za prijave je **12.06.2024. godine**.

X – INFORMACIJE O JAVNOM POZIVU

Dodatne informacije o javnom pozivu se mogu dobiti putem kontakt telefona: 033/294-139 i 033/294-136.

Prelimarna i konačna rang lista po ovom javnom pozivu će biti objavljene na internet stranici Federalnog ministarstva raseljenih osoba i izbjeglica <https://fmroi.gov.ba/>

Broj: 03-32-3-60-1/24

Sarajevo, 21.05.2024. godine

MINISTAR

Nerin Dizdar